



Angajoqqaat erninermi sulinngiffeqarnerup naammassereersimanerani paarsisussarsisimangitsunut pisortat qanoq ikiorsiisinnaaneranut tunngasumik, siunnersuummik saqqummiussisussamik, suleqatigiissitaq nalunaarummik suliaqartussamik pileritsisoqarnissaanik Naalakkersuisut peqquneqassasut Inatsisartunut aalajangiiffigisassatut siunnersuut. Nalunaarusiami siunnersuut aallaavigalugu pisortanut aningaasatigut suut kingunissaanersut ilaassapput. Suleqatigiissitaq innersuussutini kingusinnerpaamik 1. Januar 2024 saqqummiutereersimassavaat.

(Demokraatit Inatsisartutgruppia)

(Siullermeerneqarnera)

Qujanaq Demokraatit Inatsisartuni gruppiannut siunnersuuteqarnerannut. Nalunaarutigissavara, uagut Demokraatinit siunnersuut, tunngavilersuutigineqartullu tamaasa, isumaqatigigatsigit.

Akerlianik Naalakkersuisut akissutaat ukkatarerusuppara, ilumut tupaallaatigalugulu pakatsissutigigakku. Tamatta akileraarutinit akiliisarpugut, taamaattumillu aamma naatsorsuutigisariaqarparput, pisortat suliatik suliakkiutigineqartut artunngikkaat. Ajoraluartumik ukiorpassuarni takusarparput, pisortat meeqqerivinni naammattunik inissanik neqerooruteqarsinnaanngitsut. Taakku kinguneraat, angajoqqaaqarmat, meeqqaminnik paarsisussaqaanngitsunik, sulinngiffeqarnertik naammassigaangat. Tassani Demokraatinit isumaqarpugut, pisortat arlaatigut angajoqaanut akileraartartuusunut annaasaannut taarsiisariaqartut.

Kisianni naaj. Naamik. Naalakkersuisut oqarput. Angajoqqaat namminneq isumaginarlissuk. Paasisariaqarparput, Naalakkersuisut akisussaaffiginngimmassuk. Kommuninuna akisussaaffiat, Naalakkersuisulluuna suliat kivinnissaanut kommuninut oqaloqatiginnittut.

Ukorsiiaa; tassa akisussaaffimmik qimarratiginninneq ajornerpaaq. Neriutiginngilaralu, partiit maani Inatsisartuni Naalakkersuisut ajungaattissagaat. Ataqatigiilluta Naalakkersuisut pinngittaaliniartigit akisussaaffitsik asuliuunngitsoq paaseqqullugu misissorlugulu aallarteqqullugu, qanoq ililluta uagut pisortat tungaanniit angajoqqaat annaasaannut taarsiisinnaanersugut, naalliutigimmassumi, pisortat suliffeqarfiisa suliassaq tunniunneqartoq kivissinnaanngisaat.

Demokraatit siunnersuut akuerineqassasoq innersuussutigalugu Ilaqutariinnermut- aamma Peqqissutsimut ataatsimiititaliami suliareqqinneqarnissaa innersuussutigaaat.